

Nafarroako Auzitegi Nagusiko presidenteak hobekuntzak eskatu ditu kargu-hartzean

Ruiz De la Cuestak dio Justizia ez dagoela ondo inongo herrialde zibilizatutan

Erredakzioa / Iruñea

Nafarroako Auzitegi Nagusiko presidente berriak aprobetxatu egin zuen atzoko bere kargu-hartzean herrialdeko agintari gorenak zeudela erreibindikatzeko hobekuntza material eta humanoak bertako justiziarendako. Rafael Ruiz de la Cuestak gogoratu zuen Nafarroak datorren urrian hartuko dituela justizia eskuduntzak.

NAFARROAKO Justiziako erakunde gorenko presidentzia hartze ofiziala izan zuen atzo Ruiz de la Cuestak, orain arte Nafarroako Entzutegiko buruak, erretiroa hartu duen Jesus Maria Rodriguez Ferreroren partez, eta ekitaldia aste honetako kargu-hartze politikoen traza hartu zuen, bertan baitziren Nafarroako gobernuko kideak, gobernu ordezkariak eta beste agintariak.

Ruiz de la Cuesta Espainiako Botere Judizialeko Kontseilu Nagusiak izendatu zuen presidente joan den ekainaren 29an, eta bere karguari zin egin zion atzo eguerdian. Erdaraz eta euskaraz zin egin ere.

Ondoren egin zuen hitzaldian azpimarratu zuen datorren urria oso garrantzitsua izango dela Nafarroarako, orduan jasoko baititu lurraldeak justizia eskuduntzak, eta aukera aprobetxatzeko ohartarazi zuen Miguel Sanz presidentea. «Ez dugu trasbase material hutsa nahi, baina baliatu beharra dago dena hobetzeko». Bere nahia gehiago zehaztuz aipatu zuen



Rafael Ruiz de la Cuesta Auzitegi Gorenko lehendakari berria, atzoko ekitaldian.

CRISTINA ABADIA / EFE

Nafarroan gaur egun «ezin bestekoak» direla instrukzio-ko eta sozialeko epaitegi berriak, eta Entzutegi Probinzialeko gela bakoitzean laugarren magistratua.

Rafael Ruiz de la Cuestak aipatu zuen gabeziak eta eskasiak orokorrak direla justizia alorrean. «Guk daki-

gula, justizia ez dabil ondo inongo herrialde zibilizatutan, nahiz eta batzuetan, garbi dagoenez, bestetan baino egoera hobea duten». Horregatik azpimarratu zuen ezin zaiola funtzionamendu bikaina eskatu betidanik gaizki hornituta egon den erakundeari.

Presidente berria izan zen Gabriel Urralburu eta Roldan kasuko gainontzeko auzipe-tuak epaitu zituen epaitegiko presidentea, eta orain arte Nafarroako Entzutegi Probinzialeko burua zen. Lizarrakoa da, 66 urte ditu eta 42 urte daramatza Justizian lanean.

2005. urterako Nerbioi ibaia garbia egongo dela adierazi du Bilboko Ur Partzuergoko lehendakariak

■ *Lamiakoko ponpatze-planta berriaren eraikinaren inaugurazioa egin zuten atzo agintariak Leioan*

Efe / Leioa

NERBIOI ibaia 2005. urterako «garbia» egongo dela adierazi zuen Juan Jose Olabarria Bilboko-Bizkaiko Ur Partzuergoko lehendakariak atzo Leioan (Bizkaia), Lamiakoko ponpatze-plantaren inaugurazio ekitaldian. Nerbioiko ibar eskuineko hainbat alka-

terekin batera inauguratu zuen Solabarriak planta berria.

Ur Partzuergoko arduradunek datorren astelehenean, hilak 2, jendearentzat zabalduko dituzte Leioako instalakuntzak, Saneamendu Plan Osoaren baitako ingeniartza obra guztiak erakusgai jartzeko: motobonba indar-

tsuak, 18 metro sakonerako putzuak eta 1,10 metro diametroko ur-hodiak daude, besteak beste, Lamiako instalakuntzetan. 100.000 milioi pezetako kostua (4.000 milioi libera inguru) izango du Saneamendu Plan Osoak.

Duela bi urte baino gehiago hasi ziren Lamiakoko planta eraikitzen, eta joan den urte-

ko abuztutik martxan zegoen, kanpoko egiturarik gabe izan arren.

Planta honek 168.000 lagunon hondakin-urak jasoko ditu. Juan Jose Olabarriak esan zuenez, «eskualderako aurrerapauso ekologiko garrantzitsua da» Lamiakoko ponpatze-planta honen irekiera.

Jaurlaritzako Nekazaritza Sailak akordioa sinatu du hiltegiekin okelaren etiketa jartzea informatizatzeko

■ *Modu horretan*

Europako

Batasunaren arauak

betez jardungo dute

EAEko hiltegiek

Europa Press / Gasteiz

ATZO akordioa sinatu zuten Eusko Jaurlaritzako Nekazaritza Sailak eta Euskal Autonomia Erkidegoko hiltegiekako ordezkariak. Hitzarmen horri esker elkarlanean jardungo dute bi erakunde horiek, hiltegien okelaren etiketa jartzeko informatika sarean egin behar diren aldaketetarako prozesuan. Orotara 80 milioi pezeta behar dira ekimen hori gauzatzeko, eta dirutza erdi bana jarriko dute Nekazaritza Sailak eta hiltegiekako arduradunek.

Prozesu hori datorren urtearen hasierarako burutu behar da, Europako Batasuneko arauetara egokitu behar baita okelari etiketak jartzeko prozesua. Ekimena burutu ostean prozesu horren kalitateak berme osoa izango duela azaldu zuten atzo Jaurlaritzako ordezkariak.

Europako Batzordeak moldatu egin ditu dioxinen afera dela eta hartutako neurriak

Efe / Brüssel

EKAINAREN 3an Belgikan dioxinaz kutsatutako animalien afera su goritan zegoela Europako Batzordeak hainbat neurri hartu zituen. Orain, berriz, moldaketa batzuk egitea erabaki du. Izan ere, azken aste honetan ustez kutsatutako elikagaien aferarekin zerikusia duten 400 enpresa berri agertu dira, eta horrek kezkatu egin ditu.

Estreinako erabakiak Belgikan urtarilaren 15 eta ekainaren 3 bitartean hazitako oilasko, behi eta txerriei eragiten zien, zein horietatik eratorritakoei. Orain, ordea, epe hori luzatzea erabaki du Europako Batzordeak. Hala ere, ez du zehaztu noiz arte.